

四庫全書

史部

欽定四庫全書

續資治通鑑長編卷一百六十二

宋 李燾 撰

仁宗

慶歷八年春正月辛未夏國主曩霄卒曩霄凡七娶一  
曰默特氏舅女也生一子以貌類他人殺之二曰索氏  
始曩霄攻麓牛城傳者以為戰沒索氏喜日調音樂及  
曩霄還懼而自殺三曰多拉氏早死四曰密克默特氏生子

阿哩謀殺曩霄為鄂桑格所告沈于河殺密克默特氏于王  
亭鎮五曰葉勒氏約噶從女也頗長有智謀曩霄畏之  
戴金起雲冠令他人不得冠生三子曰寧明喜方術從  
道士路修篁學辟穀氣忤而死次寧凌噶曩霄以貌類  
已特愛之以為太子次錫哩蚤死後復納摩伊克結星  
女營天都山以居之葉勒之族宣言吾女嫁二十年止故  
居而得摩伊克女乃為修內曩霄怒會有告約噶兄弟謀  
以寧凌噶娶婦之夕作亂曩霄遂族約噶綱朗凌沁布

等三家既而葉勒氏訴我兄弟無罪見殺曩霄悔恨下令訪遺口得約噶妻閭于三香家後與之私通葉勒氏覺之不忍誅約噶妻乃出為尼號密藏大師六曰耶律氏七曰摩伊克氏初欲納為寧凌噶妻曩霄見其美自取之號為新皇后寧凌噶憤而殺曩霄不死剗其鼻而去匿黃羅滂家為羅滂所殺曩霄遂因鼻瘡死年四十六密藏氏初為尼寓于偽興州之戒壇院既娠而曩霄死曩霄遺言立從弟威噶爾寧其大酋威尚對密香碩

克威朗布葉木朗羅與密藏羅滂議所立密藏大族也羅滂為之長衆欲如遺言立威噶爾寧羅滂獨弗許曰威噶爾寧非子且無功安得有國威尚對曰國今無主然則何所立不然爾欲之乎爾能保有夏土則亦衆所願也羅滂曰予何敢哉夏自祖考以來父死子繼國人乃服今密藏尼娘先王之遺腹幸而生子則可以嗣先王矣誰敢不服衆曰然遂立密藏尼偽號太后曩霄既死三月諒祚生

葉宋史諒祚小字寧凌噶以慶歷七年二月六日生至八年正月方

期歲即位據此編則寧凌噶又是  
一人而諒祚乃遺腹也未詳孰是  
以毛惟昌高懷正之  
妻更乳之而政在密藏氏惟昌懷正皆漢人本約噶帳  
下故親待之已而懷正貸銀夏人惟昌竊衣囊霄所與  
盤龍服皆為羅滂所族

甲戌度支副使工部郎中鄭驤權河北轉運使仍就貝  
州經度軍須

乙亥明鎬言貝州距闔火斬守闔三班奉職李興初貝  
州城峻不可攻乃謀築距闔度用工二萬人期三十日

可與城齊而賊亦於城上設戰棚與官軍相當名曰喜相逢距圍將成又為賊所焚火三日不滅既斬興乃用軍校劉遵計即南城鑿地道而日攻其城以牽制之貝州民有汪文慶郭斌趙宗本汪順者自城上繫書射明鎬帳約為內應夜垂絙以引官軍既納數百人焚樓櫓賊覺率衆拒戰初官軍既登欲專其功斷絙以絕後來者及與賊戰兵寡不敵與文慶等復縋而下是夜城幾克丙子授文慶斌西頭供奉官宗本順右侍禁

丁丑右諫議大夫參知政事文彥博為河北宣撫使本  
路體量安撫使樞密直學士左諫議大夫明鎬副之鎬  
督諸將攻貝州城久不下帝憂之問輔臣策安出彥博  
乞身往破賊故遣彥博宣撫而改鎬為彥博之副先是  
樞密使夏竦惡明鎬恐其成功凡鎬所奏請輒從中沮  
之彥博既受命因言軍事中覆不及願得專行戊寅詔  
許彥博以便宜從事彥博請用將作監主簿鞠真卿等  
三人掌機宜文字許之明鎬所奏辟殿中丞王起等四



人仍聽隨軍 入內供奉官李繼和為走馬承受賜貝  
州城下軍士特支錢

辛巳詔士庶之家所藏兵器非編敕所許者限一月送  
官如故匿聽人告捕之

貝州賊謀竊出要劫契丹使明鎬諜知之遣殿侍安素  
伏兵西門壬午賊果以三百人夜出伏發皆就獲之

是日江寧府火初李景在江南大建宮室府寺其制皆  
倣帝京時營兵謀亂事覺伏誅既而火知府事右諫議

大夫集賢殿學士李宥懼有變闔門不救延燒幾盡唯  
存一便廳乃舊玉燭殿也尋責宥為祕書監直令致仕  
宥奏火事云不意禍起蕭牆變生回祿會新有衛士之  
變朝廷惡其言故責特重

宥責官在三月乙巳今并  
書奏表辭據司馬光記聞

癸未命翰林學士宋祁權御史中丞魚周詢定奪陝西  
河東銅鐵錢利害以聞

具六  
月末

乙酉降空名告勅宣頭劄子三百道下河北宣撫使以

備賞戰功是日彥博至貝州城下

此據甘陵  
伐叛記

先是刑部員外郎知諫院吳鼎臣言朝廷方與契丹保  
誓約而楊懷敏增廣塘水輒生事民或怨叛雖斬懷敏  
無及矣戊子命鼎臣為河北體量安撫使令經度塘水  
利害而鼎臣更顧望依違不能決也 詔給建寧軍留  
後勾當軍頭司楊景宗公使錢三分之一他不得援例  
近制刺史以上公使錢非外任不給景宗緣章惠太后  
故特給之

庚寅詔舉官陞陟及換右職者非依編敕及御札無得

施行時言者以為近歲薦舉多濫亦有負罪不可蒞  
之人得更職率為朋黨以市私恩不可不革也

癸巳東頭供奉官閤門祗候張忠為崇儀副使忠攻貝  
州先登而身被重創特擢之忠本龍猛軍士開封人也  
乙未日赤無光

戊戌工部郎中傅永為陝西轉運使永考城人前為梓  
州路轉運使夷獠寇合江鈐轄司檄兵掩擊永馳至案  
知合江吏冒取播州田衆怒乃叛永以吏配嶺南夷獠

聞之散去轉運使職田在廣安軍歲入米四百斛軍遣四校變買得四千緡永止令準市估鬻之文彥博自成都還言其治狀進永一官於是改使陝西刑部員外

郎王達為河東轉運使

書此為葉清臣條對甲寅詔問張本按達墓誌自河東貢光州

當檢  
月日

詔諸州軍祠祭在城外者長吏及兵官聽不親

行監司夜過者無得輒開城門違者以違制坐之

本閏  
月庚

子詔今移入此嫌  
與貝州事相亂也

官軍攻貝州城北甚急賊盡銳禦之而南城所穴地道

潛達城中賊初不知也閏正月庚子朔文彥博夜選壯士二百銜枚由地道入右班殿直曹竭等導之既出登城殺守陴者垂絙引官軍賊縱火牛軍稍却軍校楊遂援槍中牛鼻牛還走賊衆驚潰王則開東門遁閤門祇候張網緣壕與戰死之王信捕得則餘黨保村舍皆焚死則自反至敗凡六十五日遂開封人也

辛丑文彥博遣李繼和來告貝州平賜繼和錦袍金帶彥博請斬王則於大名府夏竦言恐所獲非真盜當覆

視之乃詔以檻車送則京師

彥博附傳云牢城卒董秀劉炳請穴地以入貝州記

聞與附傳同按實錄始謀穴地者劉遵也今從實錄附傳云帳前虞候楊遂請由地道先入據實錄乃曹竭也記聞亦稱楊遂與實錄不同今從實錄楊遂蓋能以槁中牛鼻者亦從竭入地道爾甘陵伐叛記載攻城事甚詳張忠田弑二人蓋先登者又與附傳及實錄異當考三月辛酉以右班殿直董秀為閤門祇候據此則秀非牢城卒也

附傳誤矣王則之以貝州反深州卒龐旦與其徒謀以

元旦殺軍校劫庫兵應之前一日有告者知州王鼎夜

出檄遣軍校攝事外邑而陰為之備翼日會僚吏置酒

如常叛黨愕不敢動鼎刺得實徐捕首謀十八人送獄

獄具俟轉運使至審決未至軍中恟恟謀劫囚鼎謂察吏曰吾不以累諸君獨命取囚桀驁者數人斬於市衆恐失色一郡帖然轉運使至囚未決者尚半訊之皆伏誅

壬寅升冀州為安武軍

甲辰曲赦河北賜平貝州將士緡錢戰沒者官為葬祭之兵所踐民田除夏秋稅改貝州為恩州

乙巳詔恩州置旌忠寺以追福戰沒軍士又設水陸齋



於京師普安院

丁未祠部員外郎祕閣校理張瓌為兩浙轉運使瓌十年不磨勘遷官朝廷獎其退靜故用之

此據文彥博皇祐三年五月奏

瓌本傳獨不載此

戊申右諫議大夫參知政事文彥博為禮部侍郎平章事樞密直學士左諫議大夫明鎬為端明殿學士給事中馬軍都虞候象州防禦使王信為威德軍留後入內副都知宮苑使眉州防禦使麥允言為昭宣使遂州觀

察使西京作坊使資州刺史王凱為澤州刺史東上閤  
門使榮州刺史知恩州高繼隆為引進使陵州團練使  
崇儀副使真定府路都監張忠為西染院使資州刺史  
自餘兵官各以功次遷京朝官及選人預軍期者六十  
人都虞候至士卒八千四百人第其功為五等第一等  
一百六十人轉五資第二等三百人轉四資第三等三  
百人轉三資第四等六百人轉二資第五等一千八百  
人轉一資其餘賜緡錢有差 贈馬遂為宮苑使遂開

封人初隸龍衛軍補散直改三班奉職為北京指使聞  
王則叛中夜叱咤晨起詣留守賈昌朝請擊賊昌朝因  
使將牐入城招賊降則盛服見之與飲茶遂諭以禍福  
輒不答遂將殺則而無兵仗自隨時張得一在側遂欲  
其助已目得一得一不動遂奮起投括抵則扼其喉擊  
之流血而左右卒無助者賊黨攢刃聚譟至斷其一臂  
猶詈則曰妖賊恨不斬汝萬段賊執遂縛而支解之則  
猝被毆傷病數日乃起事聞上歎息久之則既誅乃追

贈遂封其妻為旌忠縣君賜冠帔官其子五人後得殺  
遂者驍捷卒石慶使其子剖心而祭之

壬子復置三門白波發運使

乙卯武勝節度使檢校太傅同平章事判大名府兼北  
京留守司賈昌朝為山南東道節度使加檢校太師進  
封安國公以恩州平也翰林侍讀學士楊偕言賊發昌  
朝部中至出大臣乃能平昌朝為有罪不當賞弗聽

辛酉降河北轉運使兵部郎中皇甫泌監青州稅提點

刑獄祠部員外郎田京監鄆州稅前知恩州四方館使  
昭州刺史裴德輿追三官為池州團練副使前恩州鈐  
轄皇城使李昭度追三官為濠州團練副使恩州都監  
內殿承制馮文吉除名長流梅州監押右侍禁趙惟一  
杖脊配沙門島泌京坐賊發所部德輿昭度並以妖黨  
結集久而不察也文吉惟一皆懦怯棄城而文吉後頗  
宣力得以減死論是夕崇政殿親從官顏秀郭達王  
勝孫利等四人謀為變殺軍校劫兵仗登延和殿屋入

禁中焚宮簾斫傷內人臂其三人為宿衛兵所誅王勝走匿宮城北樓經日乃得捕者即支分之卒不知其所謀樞密使夏竦言于上請御史同宦官即禁中鞫其事且言不可滋蔓使反側者不安參知政事丁度曰宿衛有變事關社稷此而可忍孰不可忍固請付外臺窮治黨與自旦爭至食時上卒從竦議

爭獄事據孫抃所作墓誌并司馬光記聞

甲子降勾當皇城司建寧軍留後楊景宗為徐州觀察使知濟州皇城使康州刺史入內副都知鄧保吉落副

都知為潁州鈐轄左藏庫副使通州團練使入內副都知  
楊懷敏為文思使賀州刺史北作坊使廉州團練使劉  
永年為洛苑使英州刺史蔡州都監洛苑使眉州防禦  
使趙從約領陵州團練使為濮州都監供備庫使滎州  
刺史帶御器械王從善落帶御器械為曹州都監從善  
等五人皆外遣獨懷敏領職如故樞密使夏竦庇之也  
劉永年從德子  
王從善未詳先是有詔釋景宗等罪御史中丞魚周  
詢侍御史知雜事張昇御史何郯等言殿廷所置宿衛

本為人主預備非常今衛士自生變故所為兇悖意不可測兼後來獲餘黨最為要切聞累傳聖旨令未得殺死而全不依稟蓋是本管臣僚懼見捕獲之後勘鞫得情理深切所以容縱手下衆人毆死以圖滅口欲輕失職之罪情狀如此理無可恕太祖朝酒坊火發本處兵士因便作過太祖以本坊使副田處巖等不能部轄並處極法今乘輿咫尺賊亂竊發兇惡之狀無大於此居職者既不能察舉當宿者又不即擒捕未正典法何以



塞公議深恐朝廷威令從此寬弛伏乞斷自聖意特降  
指揮將應係勾當皇城司及當夜宿直臣僚並等第重  
行黜降用振威罰所貴禁近之司不敢曠慢從善等既  
外遭郊等又再具奏乞罷黜懷敏且言未審臣等所奏  
留中不曾付外為復中書樞密院不為施行伏緣衛兵  
竊發兇悖至甚懷敏適居官守不能先發姦謀致盜入  
宮聞驚駭御寢未行譴責深屈典章乘輿所繫至重今  
文武多士以朝廷獨寬懷敏有心者無不憤激有口者

無不驚嗟以至里巷愚民亦皆騰沸國家用刑當示公  
共不可以一近習致失衆心尋有詔懷敏落入內副都  
知與在京差遣郟等又言懷敏與鄧保吉俱是勾當皇  
城司賊發之夜懷敏正當內宿責其曠職得罪合重一  
等今保吉等例授外任懷敏獨留京師刑罰重輕頗為  
倒置中外聞見无所不平伏乞特從聖斷一例責授外  
任上令中書召郟等諭以獨寬假懷敏之故郟等又言  
人主所以享天下之重盖由法令等級明辨使人不敢

凌犯然後極其尊爾故法令行則朝廷以之彊法令偏則紀綱以之紊至於宮闈之變下人輒敢謀亂者前代間或有之皆由人君失德所致陛下撫恤禁旅未嘗以喜怒妄行刑誅雖甚無識寧不愛戴今衛士持刀直入禁庭欲凌犯乘輿是匹夫而有窺伺之意此有司不舉職法令寬縱所生也為大臣者宜為陛下深責有司失察之罪如楊景宗等並當誅戮以謝天下若以其過非自取止可貸其正坐並宜流竄以戒不職景宗等罰既

甚輕懷敏又獨異衆蓋兩府大臣畏陛下左右之怨怒不能堅執祖宗之法也若當賊發之際懷敏能於後殿即時捕獲猶可贖罪今賊已入禁庭兩夕之間陛下被此震驚固亦甚矣懷敏縱有先報之効其可贖失察之罪乎且以人主之尊寬一懷敏罪固亦細事苟於國體無傷臣等何必苦更論列所惜者祖宗之法爾太祖朝元舅杜審肇知澶州只坐界內河決免官歸私第太宗朝楚王宮火災廢楚王元佐為庶人以懷敏職在近侍

孰與元舅諸王之親以懷敏失察賊亂孰與誤河決火災之備利害大小較然可知而審肇元佐重責如彼懷敏寬假如此伏望陛下舉祖宗之法以塞公議正左右之罰以示無私不惜出一懷敏慰中外臣子之望則天下幸甚又言昨者河北恩州賊發之時提點刑獄田京率先奏報轉運使皇甫泌先至城下朝廷不為末減各已責降監當今賊至殿內比恩州事體不同懷敏若以先報減罪即是遠近異法威令不行天下觀聽何以厭

服兼恐曾與交結之人密為營救妄稱懷敏有功不可  
同等黜降伏望特排邪議一例責授外任以協公論上  
語輔臣以宮庭之變美人張氏有扈蹕功樞密使夏竦  
即倡言宜講求所以尊異之禮宰相陳執中不知所為  
翰林學士張方平見執中言漢馮婕妤身當猛獸不聞  
有所尊異且皇后在而尊美人古無是禮若果行之天  
下謗議必大萃於公終身不可雪也執中聳然從方平  
言而罷

張氏此時未為貴妃墓誌  
及附傳皆云貴妃誤也

初諫官言江寧上

始封之地守臣視火不謹府寺悉焚宜擇才臣繕治之  
命司農卿林維代李宥維固辭不行乃命維知袁州改  
命龍圖閣直學士吏部郎中張奎為右諫議大夫知江  
寧府奎既至簡材料工一循舊制不踰時復完

丙寅磔王則於都市 知洪州太常丞直集賢院李絢  
為荆湖南路轉運使時五溪蠻寇湖南擇轉運使帝曰  
有館職善飲酒者為誰今安在輔臣未諭帝曰是往歲  
城邠州者其人才可用輔臣以絢對遂除之絢乘驛至荆

湖戒諸部按兵無動使人諭蠻以禍福蠻悅罷兵受約  
東初元昊犯延州並邊皆恐絢通判邠州城卑不完絢  
方攝守即發兵治城寮吏皆謂當言上待報絢不聽帝  
聞之喜因詔他州悉治守備

城邠州當是元昊  
犯延州時今附此

丁卯誅張得一其弟兄悉坐降官妻子論如律得一以  
西上閤門使知恩州視事八日而亂作賊置得一州解  
之西日具食飲初賊取州印語曰用訖却見還每見賊  
必呼曰大王先揖而坐坐必東向又為賊講僭擬儀式




賊平得一付御史臺劾治獄具朝廷議貸死中丞高若  
訥謂守臣不死自當誅況為賊屈乎得一坐棄市得一  
既誅其第當沒官翰林學士張方平言得一父者真皇  
寵臣也此第本恩賜今得一妻子免緣坐者在且子衆  
輒沒其第於法不類詔還之

此據方平附傳然與實錄不合當考

是日

臣僚上言皇城司在內中最為繁劇祖宗任為耳目之  
司勾當官四員多差親信有心力人近年員數倍多並  
不選擇乞今後只差四員選經歷有心力沉厚之人勾

當更不許人指射陳乞如違並以違制論從之





欽定四庫全書

史部

續資治通鑑長編卷一百六十三

六

詳校官檢討<sub>臣</sub>劉錫五

刑部郎中<sub>臣</sub>許兆椿覆勘

纂修官贊善<sub>臣</sub>莊承錢

謄錄監生<sub>臣</sub>卞爾巖

欽定四庫全書

續資治通鑑長編卷一百六十三

宋 李燾 撰

仁宗

慶曆八年二月壬申遣內侍往諸路簡兵為上軍如京  
使陳延達京西路北作坊副使衛承緒淮南路文思副  
使蔡舜卿京東路禮賓副使董元吉荆南北路供備庫  
副使盧道隆江南東西路內殿承制黃元吉兩浙路福

建路

癸酉文思使賀州刺史入內副都知楊懷敏落入內副都知復為左藏庫使通州團練使滑州鈐轄始從御史之言也何郯擊懷敏尤力上諭郯曰古之諫臣嘗有碎首者卿能行此否郯對曰古者君不從諫故臣有碎首今陛下無諫不從何用如此若必碎首則美歸臣下而過在君上也上忻納之

實錄云諫官御史皆言懷敏按此時諫官惟吳鼎臣王贇又鼎

臣正月已出使贇姦邪必不敢觸懷敏實錄必誤今削去諫官二字

頌慶歷善救方上

始閱福建奏獄多以蠱毒害人者福建醫工林士元能以藥下之遂詔錄其方又命太醫集諸方之善治蠱者為一編詔叅知政事丁度為序而頒之

甲戌皇甫泌改知澤州田京通判兗州文彥博言恩州賊起泌在河北有供饋之勞京到官未踰月其家嘗陷賊故稍復之京初脫身趣南關入驍捷營撫士卒保州振武兵焚民居欲應賊京捕斬乃定賊遣其黨崔象偽出降京以其持妖言惑衆又斬以徇由是營兵二十六

指揮在外者皆懾服不叛州民之居南關者多與城中  
等得不陷賊京有力焉京督士攻城甚力賊繫京妻子  
乘城迫使呼曰毋亟攻城城中將屠我輩矣京叱諸軍  
益進攻注矢仰射殺其家四人賊知京無所顧乃牽妻  
子去初都監田斌亦以賊發不能捕待罪兵間及城破  
從諸將入以功自內殿承制遷官苑副使而京獨責御  
史言其失察賊過輕而忘家為國義為重不宜左遷尋  
又改知江陰軍

京知江陰軍未見月日必因御史  
有言自宛州又遷也今且附此



丙子翰林侍讀學士左諫議大夫楊偕為工部侍郎致仕召見宴勞賜以不拜及卒遺奏兵論一篇上憐之特贈兵部侍郎偕性剛而忠樸敢為大言數上書論天下事議者以為迂濶難用與人少合然亦能有所容初坐蔡襄等劾奏出知杭州會襄謁告過杭而輕遊里市或謂偕盍言於朝答曰襄嘗以公事詆我我豈可以私報

耶

偕明年十月乃死今并書之

丁丑降龍圖閣直學士給事中張存為左諫議大夫知

池州工部郎中直史館張沔為都官貲外郎監宣州稅並落職工部郎中張昱之為祠部貲外郎監鄂州稅濟州防禦使李端懿為單州團練使知均州殿中侍御史韓贄為太常博士監江州稅監察御史梁禧為秘書丞監衡州稅又降習妖術人李教父屯田郎中曇為昭州別駕兄周卿韶州編管母曹州編管趙仲父母妻並鄆州編管初曇居冀州武邑有告其子教在真定師仲傳妖術者禧時通判德州轉運司檄禧鞠之曇匿教不出

及移文捕逐甚急教遂自縊仲既論死轉運司奏釋仲  
父母妻子及王則反武邑吏魏化詣賈昌朝言教尚在  
賊中下御史臺治其事教實自縊復有告曇以賕免緣  
坐事連存及昱之按驗皆無實存竟坐前知真定府又  
以女嫁曇子敗昱之沔前為轉運使端懿前知冀州贊  
為通判皆失覺察猜為勘官而獄狀失詳故皆責及之

贊長山人也

據張存墓誌及附傳存先坐失覺察降汀州又坐與李曇為婚落職奪官知池州實

錄乃不書汀州之降且并與曇為婚事聯書之不知何  
也存及昱之又嘗以曇免緣坐對獄實錄亦不書今附

之益 夏國遣楊守素來告其主曩霄卒命開封府判官

祠部員外郎曹穎叔為祭奠使六宅使達州刺史鄧保  
信為弔慰使賜絹一千匹布五百匹羊百口米麪各百  
石酒百瓶及其葬又賜絹千五百匹餘如初聘之數

戊寅改新知荊州范仲淹復知鄧州仲淹在鄧二年鄧  
人愛之及徙荆南衆遮使者請留仲淹亦願留詔從其  
請 右班殿直曹竭真定府牢城指揮都虞候劉遵並  
為內殿崇班貝州平兩人力居多故優賞之

已卯詔河北安撫司瀛莫恩輩等州歲飢民多鬻子者其給緡錢二萬贖還其家

壬午祠部員外郎集賢校理同修起居注判度支勾院韓綜落修起居注知滑州綜前使契丹遼主問其家世綜言父億在先朝已嘗持禮來遼主喜曰與中國通好久父子繼奉使宜酌我綜率同使者五人起為壽遼主亦離席酬之歡甚既還宰相陳執中以為生事故責之尋改知許州以滑州當北使所由道也

乙未侍御史宋禧為兵部員外郎同知諫院先是禧鞫  
衛士獄於內侍省不能究其本謀獄既具內侍又使禧  
自為牒稱無敢漏洩已而乞徧於宮省置防謹火燭牌  
及伐禁中臨簷巨木畜羅江犬以備盜朝論非笑因號  
曰宋羅江開封府判官曹穎叔言禧為制使辱命請寘  
于法不聽至是又擢諫官

曹穎叔以府判論事  
前此未見其事當考

御史

何郯言臣伏聞禁中自盜發以來逐日分布內臣坐甲  
直宿以至伐木拆屋繕治垣牆增置關鍵其於備豫之

方固亦甚至然臣以事體酌之恐為陛下之計者誤也  
為今之宜其在一震威怒以示誅罰正大法以繩其慢  
舉大刑以討其姦斥邪偽附下之類先絕其萌芽究賊  
亂犯上之徒務去其根本不容無良而與衆共棄不漏  
有罪而示人以公法令既行紀綱既正以此御下孰敢  
不虔雖不增宮闈之警而其備堅不加省戶之衛而其  
守固與夫區區從細末之事者不同年而語矣臣况聞  
陛下過自警戒中宮之樂工已盡罷後苑之獵具已盡

除其於謹天戒而飭聖躬雖詩書所稱遇災修德之君  
遠不能逮然於禁防之設所舉者近而所忽者遠所謹  
者小而所遺者大臣竊惑焉伏乞聖慈以臣愚言命公  
卿大夫當廷公議一舉法令威刑之柄以除邪偽賊亂  
之階庶主威益尊國命益振內患既弭外虞自除則天  
下幸甚

丁酉自萬壽觀迎宣祖太祖御容奉安於睦親宅

按宋史仁

宗紀作丁酉奉安宣祖太祖太宗御容於睦親宅今書中遺漏太宗疑誤

真宗御容於天章



閣

王則之亂州郡大索妖黨被繫者不可勝數上恐濫及良民三月壬寅詔諸傳習妖教非情涉不順者毋得過有追捕時京師有告妖人千數聚蔡州之確山縣詔遣中使召捕者十人至則請以巡檢兵往索之知州吳育謂曰使者欲得妖人還報邪曰然曰育在此雖不敏聚千人境內無容不知此特鄉民用浮屠法相聚以利錢財爾一弓手召之可致也今以兵往人必驚疑請留

無往中使聽之未幾召十人者果至械送闕下皆無罪而告者伏辜

甲辰詔禮部貢舉

丙午贈恩州通判國子博士董元亨為太府少卿錄其子沂為太常寺太祝孫堯咨堯詢為將作監主簿判官李浩子偃為魏縣尉使南和尉侃衡水尉司理叅軍王獎子規覲清河令齊開子康民康功主簿王湊子安寧安世並為諸州司士叅軍仍詔規等候年及格與堂除

萬戶縣尉又贈東頭供奉官閤門祇候張綢為右領軍衛將軍

辛亥命鹽鐵副使兵部員外郎仲簡為陝西體量安撫使祠部員外郎任顥權判三司都理欠憑由司初夏國遣呂尼舒來納款要請凡十一事其尤者欲去臣稱男選顥押伴一切折以義辭屈而去及孫延壽再使雖上表已稱臣而猶欲以青鹽通中國及自買賣又乞增歲賜至三十萬詔惟許榷場及漆賜五萬其議多顥所

陳者曩霄既為其下所殺遣楊守素來告哀而守素乃  
康定中為曩霄謀不稱臣納所賜節者也顓適自京西  
轉運使奏計京師上以顓嘗屈尼舒定延壽之議留顓  
館伴顓問守素曩霄所以死守素不能對終其去不敢  
桀驚中書擬顓知鳳翔府上曰任顓應接楊守素事畢  
宜備朝廷緩急委任鳳翔不難得人執政有不悅顓者  
因命以此官

甲寅幸龍圖天章閣召近臣宗室觀太宗游藝集真宗

幸澶淵詩碑及三朝瑞物又出手詔賜輔臣曰朕承祖  
宗大業賴文武蓋臣夙夜兢兢期底於治間者西陲禦  
備天下繹騷趣募兵師急調軍食雖常賦有增而經用  
不給累歲于茲公私匱乏加以承平寢久仕進多門人  
浮政濫員多闕少又牧宰之職以惠綏吾民而罕聞奏  
最將帥之任以威制四方而艱於稱職豈制度未立不  
能變通於時邪簡擢未公不能勸勵於下邪西北多故  
敵態難常獻奇譎空言者多陳悠久實效者少備豫不

虞理當先物思濟此務罔知所從悉為朕條畫之又詔翰林學士三司使知開封府御史中丞曰欲聞朕躬闕失左右朋邪中外險詐州郡暴虐法令非便民者及朝廷幾事其悉以陳皆給筆札令即坐上對而宰相陳執中固辭上復敦諭至於三四乃聽兩府歸而上之時樞密使夏竦知執中不學少文故為帝謀以策訪大臣面使條對竦意實欲困執中也執中方力辭未許叅知政事宋庠進曰兩漢對策本延巖穴草萊之士今備位政

府而自比諸生非所以尊朝廷請至中書合議上對許  
之論者以為知體 是日翰林學士張方平既退朝會  
鎖院草制方平即條對所問夜半與制書俱上曰康定  
慶厯之間朝廷議刺民兵陞廂軍充禁旅臣時任諫官  
屢上章疏極言其害至於今日事勢果然臣昨在三司  
計會天下財用出入之籍及建隆以來兵數乞朝廷速  
加圖議蓋太祖畜兵不及十五萬人太宗朝不過四十  
萬人章聖備禦西北兵籍頗增祥符以後佳招募斥疲

老以減冗食至於寶元幾四十年天下可謂又安向因  
夏戎阻命宰相非其人慮害不深事失幾先遂致大擾  
陝西河北京東京西增置保捷一百八十五指揮武衛  
七十四指揮宣毅一百六十四指揮更於江湖淮浙福  
建諸路又添宣毅一百二十四指揮凡內外增置禁軍  
約四十二萬餘人通三朝舊兵且八九十萬人其鄉軍  
義勇州郡廂軍諸軍小分剝員等不在此數軍人日多  
農人日少三邊稅賦支贍不足募人入中糧草就京給



還錢帛加擡則例價率三倍外則剗刷諸道之物中則  
侵用內帑之財厚賞聚斂之人賤立鬻官之令苟循目  
前之急莫為經久之慮凡此冗兵非惟困天下之財用  
方且成天下之禍階若不早圖後無及矣然茲事體實  
大非君臣同心而上下協濟則事必難成伏望陛下先  
且將臣此言詳問兩府若別有長策豐財足食則非臣  
淺智所及若量入為出則乞嚴令天下禁止招募命逐  
路轉運使提點刑獄分按所部揀選疲老便與放停歲

湏三兩次更互巡歷只依常程旋旋揀放無得宣露密  
旨若雖係禁軍其間羸弱憚於教閱願退就廂軍者亦  
聽從便委樞密院點勘軍籍其人數少者即令團併其  
馬軍無馬願補填步人者稍與補充近上衣糧優處軍  
分其有馬者即與團併足成指揮仍詔諸路經略部署  
司使知朝廷深意有專懷自任無體國之心者亦在陛  
下斷自聖心懲一足以警衆矣

皇祐元年十二月何鄭  
云昨詔諸路轉運使選

退州郡老弱兵必  
是用方平此議也

臣曾勾當三班院在院使臣景祐中

約計四千餘員今六千五百餘員臣勘會學士院兩省  
以上官景祐中四千餘員今六千餘員臣任御史中丞  
將本臺班簿點算景祐中京朝官不及二千八百員臣  
判流內銓取責在銓選人畢竟不知數目大約三員守  
一闕略計萬餘人十年之間所增官數如此若更五七  
年後其將奈何今略數入仕之門禮部貢院所放進士  
明經外近例率以舉數編排別試名恩澤人每榜不下  
三數百人文臣兩制兩省少卿監以上每歲奏蔭子弟

方平論大卿監每年聖節陳乞恩澤已附六年四月壬子諸路轉運司提點刑獄正郎及帶職員外郎遇郊恩子弟亦例得奏蔭武臣自諸司副使軍職大校以上至於宮掖嬪御內臣近職每歲或遇郊恩奏蔭皆有常例又文武官因職任或致仕遺表及諸色特恩錄用又諸班殿侍三司軍大將內外胥吏牙校出職如計會每歲入官之路徼倖攀援日生新例不可勝數澄源培本在陛下命令而已乞令中書樞密院各具逐年諸色入仕名目及人數取其徼倖弊濫

尤甚者逐色別立條約稍加裁損其屬三司殿前司羣牧  
司等處酬獎條貫亦乞重行詳定臣聞先朝以前雖將相  
大臣之子孫猶多白衣未仕者今自少卿監以上輒每歲  
任一人不亦過乎祖宗之時文武官不立磨勘年歲不為  
升遷資序有才用名實之人或從下位便見超擢無才用  
名實之人有守一官至十餘年不改轉者其任監當或知  
縣通判知州有數任不得遷者故當時人皆自勉非有勞  
效知不得進自祥符後朝廷之議益循寬大故令自監當

入知縣知縣入通判通判入知州皆以兩任為限又令守  
官及三年即例得磨勘先朝行之人始知恩未見有弊及  
今歲年深久習以為常皆謂本分合得無賢不肖莫知所  
勸願陛下革此制其應磨勘叙遷者必有勞績可褒或朝  
廷特敕擇官保任者即與轉遷如無勞績又不因保任者  
更增展年考其保任之法不當一例應選擇清望有才識  
之人即命舉之如此則是委執政之臣舉清望官委清望  
官舉親民官官有關員隨員數令舉又足以見聖恩急才

愛民之意也至於將帥之任尤在駕馭得術仍宜久於其職祖宗任李漢超郭進賀惟忠李謙溥姚內斌董遵誨侯贊楊延昭等遠或二十年近猶八九年假之事權略其細故不為間言輕有移易責其成效而已又不與高官常令其志有所未滿不怠於為善也今則不然武臣指邊郡謂之邊任借之為發身之地歷邊任者曾無寸勞薄效不數年徑至橫行刺史防團廉察能飾厨傳熟於人事者即以為才而又移換改易地形山川未及

知軍員士伍未及識吏民士俗未及諳已復去矣願陛下監祖宗故事重爵賞以待功勞責久任以觀能效亦馭將帥之一節也臣頑疎不達治道據詔問所及謹以近事上對其詔旨所不及者亦不敢僭易有陳也帝覽奏驚異詰旦更賜手札問詔所不及者方平即日復上對曰今茲聖心因昨保州恩州之變得無常以河北為意者乎自唐天寶之後河北兵素以驕悍自處又北接遼境朝廷每加姑息實難處置欲選擇軍校以嚴整之



則其遷補皆不出本營非若在京及諸道可以轉員移易也欲揀選上京別補軍分則子弟姻婭蔓連根固樂土重遷非若在京及諸道可以選募轉徙也欲陞遷軍分以利動之則衣糧素厚難以更行增給臣曾勘會河北廂禁軍僅二十萬人禁軍五之四然體問其中疲老不任征役者甚多若朝廷密諭安撫部署司及轉運使提點刑獄官此後一切且住招填令依常例旋行揀放頻作番次揀選少作人數放停使由之而不知無得漏

露朝旨數年後稍稍團併據所闕指揮發在京禁軍就  
逐州駐劄使其勢足與土兵相制庶乎置器於安也今  
茲聖心因昨衛士震驚宮省得無以親衛為意者乎臣  
按周官虎賁士掌守王宮皆士也趙左師觸讐託其子  
於太后願補黑衣之缺以衛王宮蓋王宮之衛兼用卿  
大夫之子弟也秦漢以來宿衛之士不惟選材武必取  
馴慤壯愿之人以其近尊者不可不審也國初循周制  
置諸班直備爪牙士屬殿前司又置親從官屬皇城司

其宿衛之法殿外則相間設廬更為防制殿內則專用  
親從最為親兵也然募置之法則異於古皆惰游無根  
蒂莫容其身者乃來應募前此變故卒生意外臣恐當  
有以懲創之若於諸班直中選其年勞久次者至於東  
西下班殿侍有門閤家業者及諸軍中死事者之孤稍  
有材力勝兵者嚴立保委之法選取千人以充殿內之  
衛仍領屬皇城司令樞密院殿前司立定選補格式歲  
月更代之法歲滿則優遷之願留者令皇城司保任委

是壯愿謹良則聽留若其功過之準教習之法居處之制頒給之例即請自朝廷裁議臣聞太祖訓齊諸軍法制甚嚴軍人不得衣皂但許衣褐其制不得過膝豈有紅紫之服葱韭不得入營門豈知魚肉之味每請月糧時營在城西者即於城東支營在城東者即於城西給不許雇車乘須令自負以勞役之令行禁止軍士亦以足用今則異矣臣嘗入朝見諸軍帥從卒一例新紫羅衫紅羅抱肚白綾袴絲鞋戴青紗帽拖長紳帶鮮華爛

然其服裝少敝固已耻於衆也一青紗帽市估千錢至  
於衫袴蓋一身之服不啻萬錢今之上四軍請給比諸  
軍為至厚然月受千錢止可買得一帽爾度所戴帽歲  
須二枚補染服裝須要鮮潔則於諸事略稱此也計其  
所受廩給不足一身之費若有妻子安得不飢凍妻子  
既不免飢凍小人之情豈能不歸怨於上此軍情所以  
易動也至於常程特支例只對料錢勘請朝廷一次特  
支在京約用錢三十萬貫及入軍人之手何足為用是

朝廷不勝其困軍中殊未有濟所以致此者何由乎習  
為侈汰之弊也願陛下清閒之餘試召軍帥如此問之  
便可密令條陳以何術可以革今日之奢靡以何道可  
以復昔時之樸素如帥臣能自節約以身率之則軍人  
庶乎可以存濟矣臣竊惟陛下御極于今且三十年甚  
盛之事所以感格天地結洽人心之深者以其至仁慈  
厚好生惡殺能急深刻之罪寬縱出之罰哀矜底獄惟  
刑之恤也近因貝賊挾妖為亂朝廷又追劾李曇之獄

張存等例蒙重罰州郡承風覺發妖事至於誦經供佛  
符咒禁術盡遭捕繫蔓延平民豈無姦人乘便創造疑  
似或挾讎怨更相攀引榜掠之下何求不獲臣見判審  
刑院奏案七十餘道內二十餘道係是妖事雖近降朝  
旨嚴加止絕但恐官吏指李曇為鑒戒無復更用平恕  
之心臣聞賞罰猶風也人情猶草也草上之風必偃人  
情隨賞罰而遷矣臣惜陛下三十年甚盛德功虧於一  
簣寶元之後國家多故遑遑陸繹騷人事紛紜災異屢見

中外屬任之官鮮著事效推諸人事勢可憂已聖心焦勞寅畏祇厲日謹一日迄此又寧獨賴陛下至仁慈厚之德所以感格天地結洽人心之深者也奈何輕用刑獄以危天下招致沴氣以速民怨乎凡臣所陳實時要務然皆事之一節爾至於天下大勢臣請為陛下言之臣觀古今治亂之變不在他只在上下之勢離合而已上下之勢合事無大不成上下之勢離事無小不敗比年以來朝廷頗引輕險之人布之言路違道干譽利口



為賢天下承風靡然一變又外人議論展轉緣飾沾激  
倣倣惟恐不及敗壞雅俗遂成險薄內則言事官外則  
按察官多發人閨門曖昧年歲深遠累經赦宥之事而  
又諸色小人至吏胥僮僕觀時得逞敢於犯上創造詞  
說朝廷便行濟以愛憎何所不至故自將相而下至於  
卿大夫士惴惴危恐莫有泰然而自安者一動一為輒  
曰恐致人言更相姑息專避嫌疑苟且因循求免謗咎  
何暇展布心體為國立事者哉臣竊詳聖意豈欲人情

風俗之如此歟但以其所由來者漸矣自上及下無不知此者但莫肯為陛下深切開陳之也理道之壅無大於此上下之勢離阻若是則誰與陛下同心一德而深謀遠慮者哉既無同心一德之人深謀遠慮之事則天下之務何以致治願陛下深為留神務在通上下之情欲上下之情合在審於聽受而已上覽奏益異之書文

儒二字以賜方平

國史載甲寅詔問近臣對者獨稱魚周詢詳敏蓋未及知方平所對尤敏

且詳也方平本傳因神道碑但舉大略今從方平集撮取附見仍列周詢所對于後方平神道碑又云上御迎

陽門召兩制近侍復賜問且獨引方平近御榻密訪之  
方平曰暴人之私迫人於險而懷之我不為也終無所  
言紫正史方平與李淑梁適蕪紳同時  
好傾陷人者神道碑恐飾說今不取

御史中丞魚周

詢答手詔所問曰陛下患西陲禦備天下繹騷趣募冗  
兵急調軍食雖常賦有增而經用不給臣以為唐季及  
五代強臣專地中國所制疆域非廣及祖宗有天下俘  
吳蜀楚晉北捍獯鬻西服羌戎所用甲兵所入稅賦比  
之于今其數尚寡然而摧堅震敵府庫無空虛之弊縣  
官無煩費之勞蓋賞信罰必將選兵精之效也近元昊

背惠西邊宿師朝廷用空踈闡茸者為偏裨募游惰怯懦者備行伍故大舉即大敗小戰輒小奔徒日費千金度支不給賣官鬻爵淆雜仕流以鐵為錢墮壞國法而又官立鹽禁驅民齎輦蕩析常產怨咨盈路去秋水旱繼作今春饑饉相屬生靈重困於茲為劇今元昊幼子新立廼朝廷寬財用惜民力之時也速宜經制以紓匱乏願委安撫使與本路守邊掌計臣僚同議裁減冗兵節抑浮費禁止橫斂廩假貧民去武臣之庸懦出守宰

之貪殘仍冀特發宸斷出內帑錢助關陝經費使通鹽  
商之利改錢幣之法宣布德澤與民休息然後勸勉農  
桑隱括稅籍籠遺利抑兼并則公有羨財私有餘力矣  
陛下患承平寢久仕進多門人浮政濫員多闕少滋長  
奔競糜費廩祿臣以謂國家於制舉進士明經之外歲  
有任子流外之補負瑕釁服輿臺者又置於班列歷年  
既久紛猥塞路周行之內大半非才求人之際鮮堪適  
用而亟更數易交錯道塗員數有定詔除無限凡守一

闕動踰再歲其預聞籍服武弁者

按薛應旂續通鑑作預聞籍服武弁者此

云聞籍誤

今改正

坐費水衡之給虛計歲考之期赴銓調守選

格者居有困窮之嘆多隳廉耻之行官冗之弊一至於

此願陛下特詔進士先取策論諸科兼通經義中第釋

褐無令過多其文武班奏薦并流外出官者權停五七

年自然名器無濫奔競衰息矣陛下患牧守之職罕間

奏最臣聞漢宣帝勉勵二千石有治效者增秩賜金或

爵至關內侯公卿闕則以次用之故良吏為盛國家鑒

諸侯專地之患一切用郡守治之而朝班浸冗序遷者衆廼有地處蕃宣秩為卿監而未歷省府提轉則為沈抑內重外輕何以求治改弦易轍正在此時願詔兩府大臣選委兩制臺諫官叅舉如兩任通判可充知州軍京朝官依次除補若治狀尤異即升省府提轉其常例入知州及大敕舉提刑並一切停罷則進擢得人牧守重矣陛下患將帥之任艱於稱職臣聞晏子薦司馬穰苴曰文能附衆武能威敵是知將帥之才非備文武則

不可為也我朝自二邊款附久不用兵近歲有西北之警補授帥臣出於遽猝非自卒伍即恩澤侯無信義以結士心無莊嚴以正師律退則奔北進則被擒虧損威靈取侮西夏命將之失未有若今之甚也謂宜擇名臣選舉深博有謀知兵練武之士不限資級試以邊任臨軒敦遣假以威權如祖宗朝任郭進李漢超輩闔外之事俾得專之無以謗讒輕有遷徙使其足以取重則安有不稱職之憂乎陛下患西北多故敵態難常獻奇譎



空言者多陳悠久實效者少備豫不虞理當先物臣聞  
國家和約北遼爵命西夏偃革止戈踰四十載而守邊  
多任庸人不講武備因循姑息惟冀陞遷羌人野心窺  
見表裏故景祐之末元昊猖狂慶厯之初耶律悖慢覆  
軍殺將以疲關陝之民厚幣卑辭而解幽燕之敵皆用  
苟安之謀無經遠之策此班固所謂不選武略之臣恃  
吾所以待寇而行貨賂割剝百姓以奉寇讎者也願陛  
下特議於三路減兵馬之駑冗者以紓經費以息科歛

然後選將帥擇偏裨使戢肅驕兵飭利戎器識山川形  
勝用兵竒正河朔曠平可施軍陣亦宜講求其法雖二  
敵變生異時侵軼恃有所待庶幾無患矣居數日復上  
對曰臣已奉詔條畫時務而陛下復躬親訪逮蓋以諸  
臣所對未究根本故求可行之策臣不敢為文辭輒布  
愚直竊冀有所補焉所謂今之闕失者陛下聰睿高出  
前古然聖慮所未至臣下所難言者惟責任不再用人  
猜疑為大也自昔年二府大臣及臺諫官有互為表裏

者聖聰覺悟已行黜典

二府及臺諫互為表裏已行黜典周詢蓋指范仲淹歐陽修等

也遂以謂人皆朋比無復忠信今中外之臣每進對於前但敢攻人過失即為公論若言及忠良材能云可任用則慮聖意疑為朋黨故使忠邪未盡分善惡未盡聞也所謂責任不專者今執政大臣心知某事可行某法可罷但拱默自安不肯為朝廷當事致文武大政因循弛廢此又闕失之大者臣願陛下聽政之外選材識之臣獨對便殿訪諸臣能否曰某人宜何用某人不足用

然後廣詢博采參驗異同俟其得實則行進退或上承  
聖問而情有詐欺憎惡則屏之遠方終身不齒何人更  
敢朋黨又任用之際責其成效果敢當事者則優與進  
擢因循形迹者則黜居散地何人敢不盡其心乎詔又  
患文武姦回中外險詐者臣聞易曰拔茅茹以其彙征  
吉言君子小人道同性合相羽翼而進也今朝廷根本  
陛下股肱者二府大臣也安危治亂繫此數人在祖宗  
用呂端李沆王旦馬知節及陛下即位之初用張知白

王曾魯宗道輩持重處正深博有謀當時引薦擢任不  
間有朋邪險詐者今陛下知二府或非其人不能奮然  
黜逐使彙征之勢來者未已自古天子擇宰相宰相擇  
百官欲矯革此風不先正大臣則所謂形未端而求影  
之直源未澄而欲流之清也詔惠州縣暴虐法令更張  
者祖宗積德陛下好生失出者不為深罪失入者終身  
負責宜長人之吏上體寬仁愛育黎庶而或有暴虐者  
蓋公家急於賦斂以嚴集事貪吏因緣生姦以威動衆

使之然也夫法令者治世之銜勒宜守而勿失若祖宗  
法令可以經久者不宜無名更易近樞密院改內省條  
令似與曩者負罪之人預為復進之地中外喧然以為  
不可況內省者左右之近密朝廷者四方之根本倘不  
能堅守法令則天下何以取信乎願遴選刺史縣令諭  
以愛民之意則州縣無暴虐之患矣裁抑權貴無使輕  
易條憲則法令無更張之失矣

密院改內省條令  
不見於實錄當考

乙卯鎮安節度使同平章事鄆國公章得象守司空致

仕遇大朝會許綴中書門下班月給見俸春冬衣比太

子太師

給衣俸在四月  
戊申今并書

丙辰資政殿學士給事中知青州富弼為禮部侍郎始  
王則據貝州叛齊州禁兵馬達張青與姦民張握等得  
劍印於妖帥欲以衆叛屠城應則握之婿楊俊詣弼告  
之齊非弼所部恐事泄變生時內侍張從訓銜命至青  
弼度從訓可使即以事付從訓使馳至齊諭守臣發兵  
取之無得脫者乃自劾擅遣中使之罪上嘉之故有是

命弼固辭不受

戊午知齊州都官郎中劉叅為太常少卿

庚申命翰林學士錢明逸詳定赦前天下欠負

壬戌御崇政殿錄繫囚雜犯死罪以下遞降一等杖以下釋之

癸亥御迎陽門召知制誥待制諫官御史等詔之曰朕欲聞朝政得失兵農要務邊防備豫將帥能否財賦利害錢法是非與夫讒人害政姦盜亂俗及所以防微杜



漸之策悉對於篇是日知制誥曾公亮以母病在告亦遣內侍賜詔令上對殿中侍御史何邴既對詔所問又言臣竊以古者人君聽政以天下至廣非一人聰明所能盡是故內取公卿大夫謀於朝外採百工庶人議於下使下情無不通羣言無不達然後中外相濟政理所以無過差焉今國家設侍從之官自翰林學士至天章閣待制皆取文學極選以備顧問公卿之材並由此出自是相承朝廷唯以文翰待之而不責其言議臣下

亦以職分當爾而自安於循默以天下利害之大備言責者唯御史諫官僅十員而欲陛下聰明無所遺政理無所失者不可得矣唐太宗置十八學士與之議天下事故貞觀一代稱為至治斯從臣輔助之明效也在明皇時則有集賢學士張說以圖國政在德宗時則有翰林學士陸贄以參戎機以至憲宗得李絳而斥近倖之蔽敬宗因韋處厚而辨忠邪之分皆由時君開懷用意以待臣下故感慨之士得以効其節今天下多故政令

舛失者不一使賢智之士驅馳尚恐不足救其弊若猶復雍容拱默為高以言議非責則朝廷之事何所寄焉近日伏聞中詔命羣臣論議時事斯誠陛下求治之志務通壅蔽然恐天下利害非一日可盡條陳欲乞特頒詔旨告諭兩制兩省臣僚自今有聞朝政闕失政令過差軍機利害雖非職並許上章論列仍委中書置籍具錄所上章疏遇欲進用臣僚令取有裨補多者用為選首所冀親侍之臣各知責任務圖傾竭以助政化

鄭奏乞許

兩制兩省言事不知何時今附此  
奏云近日中詔命羣臣論事當考

乙丑殿前副都指揮使寧武軍節度使李昭亮為宣徽  
北院使罷軍職時開封府鞠被告妄言休咎兵士辭連  
昭亮御史何鄭乞別差官交割昭亮殿前司事免生危  
疑而昭亮亦自求罷故有是命昭亮尋出判河陽

會要  
云昭

亮以恩例  
遷此當考

丙寅詔樞密院內臣諸司使副在邊五年而無過者遇  
帶御器械闕以名次取旨帶御器械五年而無過者內

侍省押班闕亦如之其內侍省都知入內都知押班並聽特旨乃除翰林侍讀學士葉清臣在永興條對甲寅詔書所問其言多廟切權貴且曰陛下欲息奔競此繫中書若宰相裁抑奔競之流則風俗醇厚人知止足宰相用儉佞之士則貪榮冒進激成渾波向有職在管庫日趨走時相之門入則取街談巷言以資耳目出則竊廟謨朝論以驚流輩一旦皆擢職司以酬所任比日人士競踵此風出入權要之家時有三尸五鬼之號乃

列館職或置省曹且臺諫官為天子耳目今則不然盡  
為宰相肘腋宰相所惡則摅以微瑕公行擊搏宰相所  
喜則從而唱和為之先容中書政令不平賞罰不當則  
箱口結舌未嘗敢言人主纖微過差或宮闈小事即極  
言過當用為訐直供職未逾歲時遷擢已加常等宋禧  
為御史勸陛下宮中畜犬設棘以為守衛削弱朝體取  
笑夷狄不加訶譴擢為諫官以此術略獻納左右王逵  
兩為湖南江西轉運使所至苛虐誅剝百姓徒配無辜

特以宰相故舊不次拔擢遂有河東之行如此是長奔

競也其他所列利害甚衆

王達正月戊戌為河東漕寨  
曾肇銘達墓及包拯彈達章

並稱河東清臣稱有河  
北之行恐誤今改之

--	--	--	--	--	--	--	--



欽定四庫全書

續資治通鑑長編卷一百六十四

宋 李燾 撰

仁宗

慶曆八年夏四月己巳朔封曩霄子諒祚為夏國主祠部員外郎任顗為冊禮使供備庫副使酸棗宋守約副之諒祚生甫三月諸將未和議者謂可因此時皆以節度使命諸將使各統所部以分弱其勢冀絕後患判延

州程琳

按判延州程琳薛應旂王宗沐續通鑑皆作陝西安撫使與此互異

言幸人之喪

非所以示國體不如因而撫之或請乘隙舉兵知慶州

孫沔亦言伐喪非中國體上諾其言遂趣有司行冊禮

然議者頗惜其失機會

各以節度使授諸將以分弱其勢今何郊奏議有此不知當時

復有何人當考程琳本傳又云朝廷既行冊禮夏人方圍慶陽琳止詔使於廊曰諒祚貪此可紓慶陽之難乃具禮幣賜予之數移報之果喜即日迎冊使而慶陽圍亦解按諒祚此時方自保不暇何敢更圍慶陽本傳必誤按附傳及歐陽修墓銘神道碑亦不載此事不知本傳何所據也今不取

工部侍郎叅知政事丁度數請罷御史何郊又言臣竊

以朝廷正二府之名重大臣之選皆有副貳以相叅維  
或用之有勞固當進任或試之不效安可備員伏見丁  
度由近侍之班預顯用之柄列在三事于茲累年而位  
望益隆才名益損但務保身而寡過曾無經國之遠圖  
況方講戎機動資廟略謀苟多誤事何以安度又素被  
輕媚之名殊非沉遠之量上無所益國體下不能服人  
心茲為具臣難處重任且用人當否繫國重輕執政之  
臣事體尤大不可以恩假不可以幸遷必須其材乃授

此位材苟不稱則莫如闕焉伏乞斷在不疑退之以禮

辛未度罷為紫宸殿學士兼翰林院侍讀學士從度之

請也

度罷以癸未  
今從百官表

端明殿學士給事中權三司使明

鎬為叅知政事文彥博自貝州入相數推鎬功故丁度  
罷而鎬代之

壬申知澶州禮部侍郎王拱辰落翰林侍讀學士兼龍  
圖閣學士給事中柳植落翰林侍讀學士知蔡州知益  
州刑部郎中程戡落樞密直學士知鳳翔府右諫議大

夫魚周詢落權御史中丞知永興軍並坐嘗薦張得一也

癸酉給事中知蔡州吳育為資政殿學士知河南府先是御史何郊言朝廷新置紫宸殿學士代文明殿學士在資政殿大學士上班列絕高未嘗輕授丁度既罷政遂蒙特除且兼侍讀之職聖意良以二府大臣於進退之間務推恩禮竊見吳育去歲罷樞密副使出知許州不聞顯過止改給事中一官況育才業於時少比使居

學士之列適其宜也至今尚未蒙加一職名恐於待舊臣之禮殊未均一欲望存錄舊德比丁度例加一職名所冀均行寵數敷獎材傑從之

甲戌御從政殿閱諸軍轉員凡三日翰林侍讀學士

戶部郎中知永興軍葉清臣為翰林學士權三司使咸平末并三部為使官輕者則為權使公事康定初清臣已為權使公事今再領三司當為使而又為權使中書誤也自是遂分權使與權使公事為兩等

此據會要

又三司

使舊班在翰林學士之上權使即與正同三司使結銜  
皆在官職之上及是宰相陳執中欲抑清臣降敕時移  
權三司使在職下結銜其後遂班翰林學士之下尋有  
論列者結銜雖依舊而權三司使初除閣門取旨間有  
叙學士上者然不為定制

此據沈括筆談

祠部郎中天章閣

待制張堯佐為兵部郎中權知開封府侍御史知雜事  
張昇言堯佐緣恩澤進用太驟非所以公天下不報

河北轉運使兵部員外郎直集賢院杜杞為天章閣待

制環慶都部署經略安撫使兼知慶州杞前平廣西蠻  
坐殺降賞不行於是杞上言殺降者臣也得罪不敢辭  
將吏惟臣所使其勞未錄臣不敢先受命因悉為行賞  
自曩霄既稱臣而數犯約抄邊邊吏避生事縱不爭杞  
始至蕃酋蒙桑率衆千餘人內附事聞詔杞如約杞言  
如約當還而蒙桑得罪夏人勢無還理遣之必反為邊  
患議未決夏人以兵入界求蒙桑蒙桑走自匿夏人遂  
殺邊戶掠牛馬而求蒙桑愈急有詔責杞杞言彼違約



舉兵蒙桑不可與因移檄夏人不償所掠則蒙桑不可

得夏人不肯償所掠杞亦卒不與蒙桑

蒙桑事不在杞始至時今附見

不知杞果以何時至慶州程琳傳所言夏人圍慶陽或即指此也然必不與冊禮同時且近邊小小寇抄爾慶陽元未嘗被圍若慶陽被圍則闕輔駭矣琳傳必誤今不取

丙子再降知池州左諫議大夫張存知郴州坐嘗舉張得一也 詔科場舊條皆先朝所定宜一切無易時禮

部貢院言四年宋祁等定貢舉新制會明年詔下且聽須後舉施行今秋試有期緣新制諸州軍發解但令本

處官屬保明行實其封彌謄錄一切罷之竊見外州解  
送舉人自未封彌謄錄以前多採虛譽苟試官別無請  
託亦只取本州曾經薦送舊人其新人百不取一封彌  
以後考官不見姓名即須實考文藝稍合至公又新制  
進士先試策三道次試論次試詩賦先考策論定去留  
然後與詩賦通定高下然舉人每至尚書省不下五七  
千人及臨軒覆較止及數百人蓋詩賦以聲病雜犯易  
為去留若專取策論必難升黜蓋詩賦雖名小巧且須

指題命事若記問該富則辭理自精策論雖有問目其  
間敷對多挾他說若對不及五通盡黜之即與元定解  
額不敷若精麤畢收則濫進殊廣所以自祖宗以來未  
能猝更其制兼聞舉人舉經史疑義可以出策論題目  
凡數千條謂之經史質疑至於時務亦抄撮其要浮偽  
滋甚難為考較又舊制以詞賦聲病偶切之類立為考  
式今特許倣唐人賦體及賦不限聯數不限字數且古  
今文章務先體要古未必悉是今未必悉非嘗觀唐人

程試詩賦與本朝所取名人辭藝實亦工拙相半俗儒是古非今不為通論自二年以來國子監生詩賦即以汗漫無體為高策論即以激訐肆意為工中外相傳愈遠愈濫非惟漸誤後學又恐後來省試其合格能幾何人伏惟祖宗以來得人不少考較文藝固有規程不須

變更以長浮薄請並如舊制故降是詔

五年三月己卯已詔貢院所試

詩賦經義並如舊制本志以為楊察建議議而實錄但云上封者言新制不便不出主名八年四月丙子又下詔乃具貢院申請貢院申請即本志所書楊察初議也按察本傳察權判貢院初建此議當五年三月既已施行

八年四月貢院復有申請其議則實察五年所建者但不知此時察仍判貢院或已罷爾今兩存之仍於此年依實錄不出察主名本志又於此詔後書張方平知舉請下詔戒辭賦新體按方平以六年二月知舉本志誤

矣  
初詔外州發解到省差官覆考尋罷之蓋慮因此或

致抑退寒士故也

此據成都編錄條貫冊  
乃五月十八日指揮

丁丑詔開封府畿赤諸縣丞主簿尉不許他處奏辟

己卯契丹國母遣左監門衛上將軍蕭惟信寧州觀察

使趙為航契丹遣安遠節度使耶律章起居舍人知制

誥史館修撰吳湛來賀乾元節

辛卯置河北四路安撫使命知大名真定府瀛定州者  
領之資政殿學士給事中韓琦知定州禮部侍郎王拱  
辰知瀛州右諫議大夫魚周詢知成德軍先是賈昌朝  
判大名已兼河北安撫使矣

昌朝判大名  
在七年三月

初朝廷經

制河北武備議者欲增兵屯程琳自大名府徙永興軍  
徙永興軍在

六年二月

上言曰河朔地方數千里連城三十六民

物蕃庶川原平坦自景德以前敵數入寇官軍數衆罕  
有成功蓋定州真定府高陽關三路之兵形勢不接召

發之際交錯非便况建都全魏以制北方而兵隸定州  
真定府路其勢倒置請分河朔兵為四路鎮定十州軍  
為一路合兵十萬人高陽關十一州軍為一路合兵八  
萬人滄霸七州軍為一路合兵四萬人北京九州軍為  
一路合兵八萬人其駐泊鈐轄都監各掌訓練使士卒  
習聞主將號令猝緩即成部分下其章判大名府夏竦  
議竦奏鎮定二路當敵寇之衝萬有一警各藉重兵控  
守要害迭為應援若合為一則兵柄太重減之則不足

以備敵又滄州久隸高陽關道里頗近瀕海斥鹵地形  
沮洳東北三百里野無民居非敵人蹊徑萬一有警可  
決漳御河東灌塘淀隔閼敵馬未易奔衝不必別建一  
路惟北京為河朔根本宜宿重兵控扼大河內則屏蔽  
王畿外則聲援諸路請以大名府澶衛濱棣德博州通  
利軍建為北軍路四路各置都部署一人鈐轄二人都  
監四人平時祇以河北安撫使總制諸路有警即北京  
置四路行營都部署擇任兩府重臣為之議未決夏竦



入為樞密使賈昌朝判大名復命規度昌朝請如竦議  
惟保州沿邊巡檢并雄霸滄州界河二司兵馬自國朝  
以來於諸邊最號強勁今未有所隸請以沿邊巡檢司  
隸定州路界河司隸高陽關路於是下詔分河北兵為  
四路北京澶懷衛德博瀋棣州通利保順軍合為大名  
府路瀛莫雄恩冀滄州永靜乾寧保定信安軍合為高  
陽關路鎮邢洺相趙磁州合為真定府路定保深祁州  
北平廣信安肅順安永寧軍合為定州路凡兵屯將領

悉如其議惟四路各置安撫使焉

兵志云凡兵屯將領悉如其議按竦及昌

朝初議四路各置都部署等而河北安撫使仍以知大名者領之今四路各置安撫使非竦昌朝初議也蓋亦畧增損矣故特表而出之韓琦言兵勢太分請合定州真定府為一

路高陽關大名府為一路朝廷以更置甫新不報詔四路兵依陝西遣部將往來按閱又詔自今成兵回揀充

捧日龍衛天武神衛等軍

此並據本志云時契丹來議闕南地朝廷經制河北武備

按議闕南地乃慶歷二年與程琳徙陝西不相闕琳徙陝西則慶歷六年也今削去時契丹來議闕南地八字實錄於七年八月乙丑先書析河北為四路蓋誤也已削去

甲午命權御史中丞楊察同定奪陝西河東銅鐵錢利

害

具六月末

交州入貢以進奉使兵部員外郎蘇仁祚為

工部郎中副使東頭供奉官陶惟懽為內殿崇班

仁祚等初

來時未見

丁酉降衛州團練使知澶州王德基為四方館使榮州

刺史西上閤門使知保州王中庸為引進副使殿中侍

御史劉元瑜罰銅三十斤並坐嘗舉張得一也

初改文明殿學士為紫宸殿學士丁度罷政首以命之

御史何郯言紫宸不可為官稱五月乙巳詔改舊延恩殿為觀文殿仍改紫宸殿學士為觀文殿學士班次如舊制

乙卯兵部員外郎知諫院宋禧出為江南東路轉運使已未改荆湖北路禧雖罷諫職猶得為監司議者非之御史何郯言臣聞治天下者欲保邦於常安無他道焉其要在核名實別邪正而任之爾夫邪與正不相須治與亂不相遠用君子而消羣枉則治之表用小人而

黜衆正則亂之階所以自古聖哲於治亂安危之際未嘗不丁寧切至以進君子抑小人為戒非其好惡有所偏蓋以邪正雜揉而進則國之興衰未可期焉民之否泰未可保焉故不得不辨明矣然知人之難歷聖所病雖遇睿哲之君不無奸慝之臣以堯之聖而其臣有毀信廢忠之害以舜之明而其臣有讒說殄行之惡然雖始失而任使終悟而放黜此二帝之所以稱聖明也以古揆今邪正之徒無世不有雖有邪偽而使之不能害

理者其由人君公用舍而已伏見樞密使平章事夏竦其性邪其欲侈其學非而博其行偽而堅有纖人善柔之質無大臣鯁直之望事君不顧其節遇下不由其誠肆已之欺誣謂可以蔽明任已之側媚謂可以矯正犯紀律之所戒而不耻冒名教之所棄而不疑聚斂貨殖以逞貪恣不可格以廉耻之行比周權倖以圖進取不可語以忠正之方夫以此厚祿極竦之量可謂盈矣以此寵位稱竦之材可謂過矣而猶其求無厭其進不止

動有覬望務為竒邪人之無良一至於此近者衛兵為  
亂突入宮掖變故之大可為寒心凡在職守失於防察  
責其慢官宜寘大戮而竦只緣管皇城司內臣楊懷敏  
素與交通曲為掩藏欲以結納主憂於上而不為之恤  
民議於下而不知其非但欲私相為恩未嘗公議其罪  
所以致官司之責不均一賊黨之惡不究窮是謀為已  
利則慮深圖去君害則計淺居股肱腹心之任所舉如  
此不忠莫大焉今千百具僚皆謂懷敏失察賊亂只緣

官責其罪小夏竦多懷顧慕不奮臣節其罪大今懷敏  
既默而竦獨留中外之心無不憤激况竦兩以明恩進  
拜皆用清議改除衆口謂之姦邪聖心諒已諳悉棄而  
勿用茲謂至公而方且謂之有才任而不改其於含垢  
匿瑕則為過甚其於去邪除惡竊所未安且前代立法  
本為束縛有才姦邪而才必亂天下若不防之於始又  
何以救之於終况以陛下唐堯虞舜之資而監竦擣机  
窮竒之行寘之有罪斷然不疑伏望陛下上為社稷之



謀下慰臣庶之望與衆永棄示人不私豈不盛哉豈不快哉臣以孤生屢抗大議犯權貴而為私室之計則拙斥讒邪而為公朝之利則忠臣料夏竦知臣上言必是指臣為矯誣目臣為朋黨然竦明有過惡安得謂之矯誣臣素無附麗何以謂之朋黨竦若猶飾其過臣請面議其辜仰祈聖明俯臨肝膽

當時言竦姦邪者必不止  
郊一人而郊傳獨稱郊言

竦不可為樞密使又郊奏  
議有此章甚備故具載之

辛酉樞密使河陽三城節度使同平章事夏竦罷樞密

使判河南府言者既數論竦姦邪會京師同日無雲而震者五上方坐便殿趣召翰林學士俄頃張方平至上謂曰夏竦姦邪以致天變如此亟草制出之方平請撰駁辭上意遽解曰且以均勞逸命之何郟又言伏聞夏竦陳乞一殿學士職名且欲預在侍從緣朝廷進退大臣恩禮至厚竦之此拜已極寵榮安可更不顧廉耻冒有陳請况竦姦邪險詐久聞天下陛下特出聖斷罷免樞要中外臣子莫不相慶固不宜許其自便留在朝

廷孔子謂遠佞人蓋佞人在君側則必為政理之害其

夏竦伏乞不改前命仍指揮催促赴任從之

夏竦乞殿學士職名

留京師國史不見今據何  
鄭奏議及鄭墓銘附見

給事中參知政事宋庠加

檢校太傅行工部侍郎充樞密使

壬戌樞密副使左諫議大夫龐籍為叅知政事 詔諸

道非鞫獄而差知縣縣令出者以違制坐之其被差官

據在外月日仍不得理為考時權三司使葉清臣自永

興召還言所部知縣有沿牒他州而經數時不歸者恐

假領之官不能盡心職事故條約之

七年六月  
辛酉可考

乙丑出殿中侍御史張經知蘄州以所上臺章荒謬也  
丙寅詔諸軍校營在新城外者每赴朝留其半以部勒  
士卒

丁卯詔應中外官自今須滿三周年方許差替其在任  
三年及三十箇月者自如舊制見溢員處並罷之其俸  
祿仍不得越本官支給時營進者或不時滿遷去又在  
京多員外置官至有諸司副使請正使俸防禦使請觀

察使俸之類故降是詔

六月戊辰朔詔近臣舉文武官才堪將帥者以名聞  
壬申資政殿學士戶部侍郎知曹州任中師為太子少  
傅致仕

癸酉河決澶州商胡埽

甲戌遣官祈晴

丙子遣權發遣戶部判官事燕度行視澶州決河

庚辰詔轉運提點刑獄司自今體量所部官吏並須明

指事狀以聞先是選人劉世隆因引對自言前為監司挾情奏衝替已而御史言在外貪暴之吏監司不欲盡發其罪止奏乞衝替致還銓得以為言故條約之

壬午太子太師致仕徐國公張耆卒贈太師兼侍中謚榮僖者為人重密有智數安佚富盛踰四十年家居為曲欄積百貨其中與羣婢相貿易有病者親為診切以藥賣之欲錢不出也所歷藩鎮人苦其擾子二十四人御之極嚴早見即令出就外舍得一既坐降賊誅可一

後與羣婢賊殺其妻亦棄市

己丑戶部副使刑部郎中向傅式為太常少卿直昭文館知亳州傅式敏中第二子權三司使葉清臣言其庸陋不任事也河北轉運使刑部員外郎直集賢院包拯為戶部副使拯前自陝西徙河北才五浹日召入三

司奏罷秦隴所科斜谷務造船材及罷七州所賦河椿

竹索皆數十萬

八年五月二日自陝西改河  
北六月二十二日除戶副

庚寅祠部員外郎集賢校理張揆為河北體量安撫使

壬辰帝語輔臣曰春夏久雨朕日蔬食夙夜禱於上帝  
儻霖淫未止當去食啜水冀移災朕躬然不欲使外聞  
之嫌其近名耳宰臣文彥博對曰今景氣澄晏實聖德  
感通也

癸巳遣官謝晴

給事中叅知政事明鎬疽發背帝謂輔臣曰鎬忠亮有  
勞及其未亂思一見之是日臨問惻然曰方賴卿謀國  
事何遽被疾鎬氣億猶能頓首謝甲午卒贈禮部尚書



謚文烈錫端挺寡言所至安靜有體而遇事不苟為世所推重

乙未詔館閣官自今須經親民一任方許入省府及轉運提點刑獄差遣

按宋史入省府下有及字今增入

丙申司空致仕章得象卒故事致仕官乘輿不臨奠帝特往奠之贈太尉兼侍中謚文憲初陝西軍興移用

不足知商州皮仲容

康定元年十一月

始獻議采洛南縣紅崖

山號州青水冶青銅置阜民朱陽二監以鑄錢既而陝

西都轉運使張奎

慶歷元年五月  
奎為陝西都漕

知永興軍范雍

慶歷元年

五月雍知永興軍兼漕事

請鑄大錢與小錢兼行大錢一當小錢十

奎等又請因晉州積鐵鑄小錢

元年九月

及奎徙河東

二年十月

又鑄大鐵錢於晉澤二州亦以一當十以助關中軍費

未幾三司奏罷河東鑄鐵錢而陝西復采儀州竹尖嶺

黃銅置博濟監鑄大錢

據寶錄  
在四年

朝廷因敕江南鑄大銅

錢而江池饒虢州又鑄小鐵錢悉輦致關中

江池饒三州見元年

十一月虢州未見  
當是范雍所議

數州錢雜行大約小銅錢三可鑄當

十大銅錢一以故民間盜鑄者衆錢文大亂物價翔踊

公私患之於是奎復奏晉澤石三州及威勝軍

實錄云  
在五年

日鑄小鐵錢獨留用河東而河東鐵錢既行盜鑄錢者

獲利十之六錢輕貨重其患如陝西言者皆以為不便

知并州鄭戩

六年二月  
戩知并州

請河東鐵錢且以二當銅錢一

行一年又以三當一或以五當一罷官鑪日鑄但行舊

錢知澤州李昭遘

六年四月  
昭遘知澤州

亦言河東民燒石炭家

有橐冶之具盜鑄者莫可詰而北敵亦能鑄鐵錢以易

並邊銅錢而去所害尤大朝廷嘗遣魚周詢

四年三月

歐陽

修

四年四月

分察兩路錢利害又數命官議

正月己酉四月甲午

於是

翰林學士張方平宋祁御史中丞楊察與三司使葉清

臣先上陝西錢議曰

六月乙未

關中用大錢本以縣官取利

太多致姦人盜鑄其用日輕比年以來皆虛高物估始

增直於下終取償於上縣官雖有折當之虛名乃受虧

損之實害救弊不先自損則法未易行請以江南儀商

等州大銅錢一當小錢三

策宋史食貨志三作二

又言姦人所以

不鑄小鐵錢者以鑄大銅錢得利厚而官不必禁若鑄

大銅錢無利又將鑄小鐵錢以亂法請以小鐵錢三當

銅錢一既而又請

七月辛丑

河東小鐵錢如陝西亦以三當

一旦罷官所置鑪朝廷皆施用其言自是奸人稍無利

猶未能絕濫錢也其後詔商州罷鑄青黃銅錢

皇祐二年二月

又令陝西大銅錢大鐵錢皆一當二

嘉祐四年二月

盜鑄乃止

然令數變兵民耗於資用類多咨怨久之始定

實錄於六月乙

未載陝西議七月辛丑載河東

議今從本志并書之此月末

秋七月戊戌資政殿大學士戶部侍郎知并州鄭戩加  
吏部侍郎留再任尋改宣徽北院使檢校太保判并州  
初契丹與元昊方交兵邊奏互上獨戩未嘗以聞詔遣  
使問其故戩對敵自相攻中國不足憂也麟府間有棄  
城曰草城戩募土人為弓箭手計口給田自河東行鐵  
錢山多炭鐵鼓鑄利厚重辟不能止戩乃請以三當一  
令既下兵民相煽動數十人邀走馬承受訴承受中貴  
人不能遏又羣譟州門守門者拒不得入兵馬都監孫

惟忠慮變起使人衣甲而持兵判官張伯玉謂曰此法亂非百姓亂也若縱兵殺一人則事不可平矣戩聞悉

召至庭下推首謀者數十人黥隸他州

張茂實傳云茂實為并代部署

河東更鐵錢法人情擾惑兵相率至帥府欲訴閉門不納是日幾亂茂實策馬從數卒往諭之皆散還營按鄭戩傳則戩悉召至府廷與茂實傳不同今止從戩傳

詔河北水災其令州縣募

飢民為軍

己亥右領軍衛大將軍果州團練使知壽州張亢為將作監知和州陝西轉運使言亢所易庫銀非自入故稍

復遷之

癸卯度支判官刑部員外郎周沆為直史館知潭州兼荆湖南路安撫使仍詔沆位提點刑獄之上若轉運使即以官敘之先是北軍戍湖南山谿者有再期乃代去多死瘴癘沆奏請皆以期年為斷詔可

敘位乃八月癸巳今并書戍以

期年為斷據本傳附見

甲辰詔河北四路安撫司凡移用軍糧錢帛並牒報轉

運司



辛亥分遣內侍詣河北陝西河東京東西淮南六路募民獻薪芻授以官

癸丑賜黃河役卒緡錢

甲寅命河北都轉運使戶部郎中天章閣待制施昌言都大管勾澶州修河事四方館使榮州刺史知澶州王德基同都大管勾通判澶州屯田員外郎張諤國子博士張士程同管勾修疊河口衛州言大雨水入城諸軍出城走避今數日絕食已借支七月糧而軍食未繼

望特蠲除從之

丙辰命馬軍副都指揮使武安留後郭承祐為澶州修河部署戊午加建武節度使庚申即以承祐權知澶州

尋又加殿前副都指揮使

遷殿副乃是月癸未令并書

辛酉權發遣戶部判官屯田員外郎燕度同知澶州兼管勾修河事

甲子命翰林學士宋祁入內都知張永和往商胡埽視決河及覆計工料